

靜

廉

齋

詩

集

靜廉齋詩集卷三

仁和金 甦雨叔

散館

欽命賦得鴻漸于陸

得和字

乙丑

咫尺天衢接高鴻振羽多乍看遵陸起旋見拂雲過俯
聽關門柝遙臨楚水波聯行元有序應節本含和不覺
層霄迴還憑健翮摩長征依日月冲舉謝煙蘿矯矯從
賓列翩翩近禮羅未須鳴鶴和鳳翽擬卷阿

是日恭和

御製元韻

飛鴻占漸進天路近陽和借翼知誰助銜蘆匪自他不
矜文采異但少帛書訛送影常浮渚留蹤尙印莎由來
工避繳何事怯張羅已解隨鴈鷺仍堪列鸛鵝三年思
戢羽一舉記聞歌妙演爲儀象
仙毫注意多

題杜文公祠爲前輩沈荻林

廷芳

侍御作

先生故是開口椒拾遺不以詩名高暫驅驄馬出東道
轉漕行水惟賢勞乘間直上泰山頂海天隱隱聞春濤
白雲孤飛向南國北瞻魏闕峨雙標銅樓挹壁感興廢
金泥玉檢供譏褒南池宴賞久寂莫前賢待子揚風騷

幽居自戀浣花勝東郡豈得忘游遨城隅一棹泛秋水
青瑣高詠形神超試爲尋置草堂地深簷穩結三重茅
錄事何煩寄貲助主簿正須折柬招當年草草具賓主
到今配食同弦匏經營斷手薦春酌吾師痛飲非無聊
迎神送神曲新製歌聲縹緲迴雲璈東之諸侯喜高會
但愧斯舉煩星軺文公祠榜表嘉謚豈意得請從右貂
原倡注云少陵謚文元元貞中從中涓鈕憐請也見張
伯雨跋憐詩按元史順帝紀至元三年夏四月丁酉謚
唐杜甫爲文貞脫鞞裁罷謫仙謫鈕憐應哂非吾曹石門金尊
倘重把咫尺自可聯神交我昨南行窮嶺海殘冬返過
東平郊平生傾倒沈夫子驛亭悵望吟寒宵側聞盛事

色飛舞此行出手成盧梟春明連袂話曲折小冊馳送
勤相要我詩未足張風雅一語聊取資詼嘲先生惠愛
蚤洽著尸祝行睨東人庖辦香竟入少陵室異代把臂
情陶陶霜威正恐逼山簡簿公母乃逡巡逃此中位置
請先定均茵避席無喧呶更傳瘦影飯顆見吳生石刻
留白描不聞摹搨廣持贈歸裝兼兩來何操先生得詩
粲然笑野馬驛突無銜鑣他年進汝杜公側坐見宛轉
遭荆條

沈孝子

數愍

贊

鍾山之玉炊以爐炭至德淳精蒙難斯見偉矣沈生奮

身丹爛母極得完兒心何憾祇痛阿耶計程弛擔忍死
未能不瞑而含忠孝名揚半歸焦爛竹素騰輝熊熊粲
粲有子如斯所生無忝刊石表閭我詞匪僭

八月二十八日 瀛臺侍宴恭和

御製元韻 丙寅

清漏催傳動曉珂翠華秋豫協辰和會聞弱水環蓬島
況值增城稔木禾行葦早承膏露降翔鶴還趁錦帆過
瀛臺宴賞欣重遇六十年來續

帝歌

警列珠官羽衛稠若華通映袞龍浮洞庭張樂仙音振

懸圃鐫題 睿藻流珍膳賜嘗銀作鱠芳樽宜勸玉爲
丹青要取次催霜信却有薰風到殿頭

波光山色兩嬋娟秀浥 天臺靄玉煙賦罷柏梁香染
襲坐移曲水樹交筵錦鱗珠果分筐錫文綺瑤編接席
傳仙苑更教閒領略壺中長日總如年

松陰欹蓋儘遲留旣醉 恩深愧仰酬繩武勤修三代
典慶豐長報十分秋地符秀啓堯階莢嶽貢祥徵夏輅
鉤何幸 小臣 參珥筆五雲天近識環洲

五月二十九日 乾清宮

御試賦得洞庭張樂 得和字七言六韻 戊辰

軒律新調陳雅奏咸池振響洞庭波曾踰大夏栽雙管
却傍君山試九歌韻叶韶鈞三古倡風傳岳瀆萬靈過
仙璫似向雲中應綵簾還看鏡裏多從此降精思帝子
仍聞按節得湘娥祇今縹緲留遺蹟自有希聲鼓太和
聖武遠揚金川平定功成奏凱恭紀 己巳

帝持秦阿柄威德萬方服蠡爾金川曾狡焉逞豕突小
醜何足誅煽亂不可赦叶專閫任誠重應機須蚤決籌
策故紆迴養癰計已拙維

皇思敵愾清禁慎謀帥叶國家親重臣忠勇誰第一臣

恆仰成算日夜圖展竭克簡

至尊心禡牙親授鉞太白高揚光深入敢戰吉天兵莽
雲合飛翰不以疾上將更星馳奮身先士卒束馬陟崖
巔裹瓊巒山足英風振剛氣積石欲摧裂外寇佇披攘
內奸先剔抉雄狐及牝雞駢首服軍律鬼蜮始騷除豺
狼爭喙息申威旋督戰銳進乘膽破叶昔嶺挫兇鋒巴
郎克堅壁盡徵諸道會共決擣巢策不須九曲穿直以
萬鈞壓釜底沸湯煎穴中窮鼠泣哀籲繞軍門令嚴如
截鐵投生苦無地束手待堪鎖

皇心運金鏡萬里洞毫髮捷書初報聞羅網計難脫聿
開自新路期以息征役慮勝在機先神妙應呼吸仰惟

天覆溥用戒火炎烈承 制赦其人納降斯得活歡聲

儵雷動生死肉白骨匍匐望壇拜六事誓不越獻費到
金人上供如供佛銜鉤出重淵霜刃竟不副永懷明珠
報何敢妄撥刺是時天清明光景頓軒豁兵前草木風
陽和普噓拂棱威月嶠震融樂雪山液 廟略旣遐宣
蠻荒遂寧謐銅梁卷征旆金闕望歸轡 叶 勾當公事還
從容閣門謁單騎見汾陽七擒服諸葛偉績如古云

欽袞聞 制曰桓圭五等崇豹尾雙竿揭出師無留行
第賞不踰月從戎皆拜 恩勤事竝蒙恤嘉勞紀功級
蘇困賜蠲復策勳還飲至尊俎喜洋溢彤墀肅班賀卿

喬浮袞黻庶幾宵旰寬樂愷見玉色是用告成功地天

申仰答

叶

神祇通肸蠁三極統明察

叶

羽衛首征塗

珠邱薦芬苾顧歆

九廟靈申錫萬年福

叶

慈寧垂

懿訓啓迪荷明悉歸善晉徽稱奉觴上寶冊駿業紹前

光兵事爲後法

叶

雲漢炳天章穹碑鰲負屹文經武則

緯在泮禮惟協側想事之殷洎乎伐功卒輿論或然疑

宸斷期必拔

叶

武師方席捲遽止乘墉克陰陽互開闔

威惠兩不測

睿智如轉規動與事機直日月遠照臨

震電捷轟掣霍然埽妖氛膏降醴仍出乾坤自清泰太

虛本無物乃知天合符神武信不殺

叶

邊徼長收寧中

區增富實聲靈時一振姦宄絕萌茁止戈乃全勝武德
實兼七六宇慶軒襲千秋煥鐫勒作頌紀其詳臣職忝
史筆

宗室義文編修

達麟圖

以指頭畫扇索題畫無奇

特而扇製殊異爲詠一篇

往聞南都扇爭重李昭骨古意旣失傳新樣日輕薄雕
刻豈不工先秋慨摧裂平生入懷裒常喜得舊物偉哉
尺二強滑淨擬玉笏渾樸隱廉隅開張足風力卽此耐
久朋無須覓殊特達生天潢派祕寶富什襲便面何足
誇亦與外間別本大末乃小取勢曲而直關弓內相向

密櫛宛交比

叶

應知匠心苦全力謹鈴閉

叶

展作波淵

旋斂成筍苞茁劒把欄具裝花插膽瓶挈文犀理星透
瑇瑁采霞蔚月團空點綴光氣已騰越況逢寫生手用
指不用筆貌得古仙人清姿照泉石遙空引松吹靜對
解煩暘此畫自瀟灑此扇稍奇譎但爲經久計詭正幸
殊不趙璧良可貪家珍非一格題罷舉還君君仍慎豪
奪

送同年雷翠庭

銕

前輩歸省

銀臺直北迎天閭次宗久在延賢堂說經未敢問晨夕
請急曷爲騰奏章疾疢纏綿稍羸瘠鄉里傳聞或增劇

臣心念母母遙憐臣母憂臣臣轉迫情誠呼籲天可通
天顧況在咫尺中陳情未上幾愁絕報可捷下同春融
潞河風滿輕帆駛歸思如流日千里京華舊雨惜分張
我獨期君別彈指 恩綸蚤向八閩宣護砌欣榮鶴髮
鮮頻歲長煩倚閭望卽今須侍版輿還直廬好景如圖
畫奉職承歡兩愉快春秋佳日列長筵我曹總得升堂
拜

汪寶符 立恆 報秋圖

榮枯驗物理桐葉感秋報達人鑒未萌況乃圻其兆維
昔嘉蔭 汪氏 繁高枝鳳雛范云胡委金井撼撼不勝埽

牆東寄廡客

余昔讀書范氏叢碧樓卽汪氏秀舍分割者

閑默隱相弔今雨

舊雨間

今雨堂余家湖墅舊居也四歲而遷二十九歲而賣今寶符新居與焉而余無立錫之地飄

零慨天肖靈根有餘潤摧折豈嫌暴君仍龍門生我亦

爨下嘯回頭卅年事心悸輒旌搖西風來無時警省苦

不蚤葉落長年悲及時觀微妙駐景有神方

寶符近習導引之術

助成後彫操披圖服深識相視涕還笑哀樂豈無端正

須兒輩覺亭皋適微脫秋思滿懷到舉似范履霜故應

許同調

圖有范九池前輩題句時方失官自戊戌以來兩家兄弟肄業叢碧樓者先後同舉於鄉宦海

萍漂死生契闊今惟九池與余在追念舊雨時相對黯然

靜廉齋詩集卷三終

靜廉齋詩集卷四

仁和金 性雨叔

送葉生君藩鎮宰德安因寄九江守劉嘯谷炳同

年 庚午

我昔廬山去初程過九江香爐吐雲氣縹緲見旌幢葉
令飛鳧去居然適此邦懸知公退暇琴韻玉琤琤太守
髯仙在龍文舊對扛到時憑寄語莫惜鯉魚雙

聖駕南巡恭紀五言古詩八首 辛未

維

皇紹

祖烈辰駕勤省方東巡放遼海畿輔龍迴翔周岳始嵩
岱八表瞻天光禹迹掩南紀州域開維揚朝宗本形勢
望幸騰封章

帝謂守土臣此邦予豈忘浮河達江海規畫嚴隄防因
之覽名勝問俗仍行慶矧予每游豫祇奉

慈顏康璇官方介壽風景仙壺長顧茲佳麗地良足供
稱觴

重光協洽歲正月卜征吉宗祈初獻事躬奉安輿出玉
戲屢豐占火樹先春苗和風扇喜氣催暖勝調律鳴鸞
過燕趙日觀望嶠岑

皇情軫民隱累稔尙勤恤水國有期程雲巢

岱頂行宮名

緩

停蹕川嶽仰懷柔牲幣禮咸秩河宗行獻寶波偃馮夷室

烝徒鼓輕楫宛御飛龍游淮黃兩奔迅神警皆安流金隄倚竹榭
睿慮增綢繆吳兒密於蟻夾岸窺珠旒
帷風澹澹信宿越邗溝蜀岡通脈遠吳岫憑軒收天塹
古云險時清一葦浮金焦屹雙闕鐵甕吞三州
大閱京口兵遂登北固樓江海寄鎖鑰心畫韜鈴留白下隱
煙柳丹陽紆藻舟蓉湖傳棹唱遙應吳趨謳

三江勢交滙輿府惟姑蘇匝地煙火密帶垞邱壑殊朝

天攢玉笏雲表山祇趨樹羽翠微上萬歲樓前呼靈巖
暢遐覽洲島浮具區緬懷龍威祕詎嫌香徑蕪探梅俯
雪海清景羅浮輸孤山伴高隱未知得似無茲土信奇
麗謠俗聞吳都鐘魚銷霸氣花月傳酣娛宸襟涵太
虛過眼雲煙俱一水貫吳越帆指鴛鴦湖

浙水報初程兆協嘉禾秀煙雨敞飛甍吳山指遙鰲鳳
輦駐錢塘臨觀宋都舊重湖啓明聖松棟堯年構行

殿映瑠璃好景目奔湊花事及春深柳浪鶯簧奏空色
問禪林奇峯陟靈鷲絕頂見江濱徒蹕趁潮候名山禮
南鎮明德崇夏后蘭渚鏡湖間風流品先後龕赭海門

通歸墟時擁溜負舟龍尾畫靈若遠翔走輯玉會稽還
績擬平成懋

句吳暨於越兩地通參承遙瞻相風羽西指當金陵龍
虎久蟠踞正迎華蓋升勝國寢園在酹酒陳蘭丞六代
感興廢肅若臨淵兢高閣雞鳴巔斗車帝座憑江山窮
遠日楚蜀風雲騰琳宮金埴涌寶炬輝千層經臺散花
雨肸鬻天人應祝釐致香供餘福資黎蒸功宏事乃畢
鼓施飛雲乘蘆磯翻燕剪如送迴颿興龍躍順流去萬
里春臺登

星文占福德朗映斗牛次萬乘果來游湛恩難悉記蠲

租還減賦忙晦雲油被應識稅桑田都緣勸農事負羽
或塞菱熬波及轉餽正使自言情體恤乃不啻羣工滌
瑕垢晉秩獎劬勤頻璧廣芹芳詞科仍拔萃俗尙涉浮
華天心牖民易崇雅竝還醇移風咨有位鳩杖道旁
言重拜

先朝賜何以報

皇仁千春奉

慈懿

德音旣洋溢 睿藻尤聯翩宴賞屢賡和飛翰枚舉先
章疏自批答郵驛無稽延勲華滌河洛不聞歌詠宣四

海仰文命宛委誰雕鐫其餘皆自鄒寧數橫汾篇 天

章麗雲漢厥惟 家法傳 微臣 適多幸居傍明湖邊

仁皇留聖製瞻誦由童年茲逢重光日符采輝山川無
緣奉神筆逖聽還成編迎鑾重南望想像奎鉤連

出都呈閣學蔡葛山 新前輩

簡書承北闕文派導西江斷有中郎獨才無國士雙庸
姿慚玉倚清論聽金提應識春洲畔寒來盡茝芷

趙北口

千丈虹隄勢吸波江湖在目勝情多壯游楚尾吳頭去
陳迹燕南趙北過廿載公車衝雨雪兩番使節度關河

定知官柳常迎客曾識先生鬢未皤

輿中遣悶

少小乘船苦頭眩老著車中時欲旋戚施不作作籛條
仰視如常俯殊觀平生頗復解耽書枕邊廁上還無倦
腰輿安穩足披尋眼亂何曾開一卷游思縹緲任飛揚
入地升天俄萬變非無佳句萌芽生亦有奇境端緒見
絮飄無蒂肯歸根弦迸少膠難續斷也知且作碎金收
錄取他時供鍛鍊可堪筆硯久隨身首不能低矧運腕
無爲未得并無思有思祇逐煙雲幻身閒心擾靜中忙
終擬借書收汗漫劇憐心眼不相營清福將毋天所限

朝朝袖手向南天
春信遙空候歸雁
塵埃難得好光陰
可惜閒拋一月半

在平遇楊氏僕寄調同年企山

述曾編修

君家太尉亡小兒
知心乃得新青衣
遙遙華胄有故事
親朋敦勸誰能違
我先奉使適南國
燕齊千里來山在
魚山神女望中遠
犢車緩緩控不馳
長鬚前拜作吳語
語不全了意會之物
無兩大各有副禪
參一指於義微

楊僕向余豎一手指故云

如夫人者此其是卿爲君逆禮亦宜舉帷

便擬作平視使節那不持威儀引車分道別左右吾友

儼若臨於斯却愁吾友老不曉茂陵尙羨多名姬

時企山典

試陝西 蚤春桃葉入香閣小君留伴吟伊威金錢對擲協

佳兆征夫俄自秦關歸我憐已久君始見卿若不言吾

豈知星前絮語問今夕其新其舊其如台某於此樂分

所限懸揣頗復通先幾偶然作劇助諧笑曲終雅奏爲

君規君年正滿天地數企山今年五十五五變三索唯汝爲不

須出獵訪絡秀正要作詩誇袁師遲生或比海中果過

極定有枯楊梯伏雌不解效鵠菴老鳳合并遭仙筭同

年約法素簡易申戒勿犯犯必施壬戌同年未得子者頗多每歲團拜余輒

有勒限追比之謔今負課者尙數人企山其一也

鄒縣謁 孟廟聞葛山述夢作 壬申

暮宿魯南門靜想聞邾析蔡侯感奇夢恨我不同作晨
征五十里亭午憩鄒郭偕行趨孟廟再拜展虔恪巖巖
亞聖姿大道賴重廓至今浩然氣宇宙自磅礴升堂歷
闕與母訓凜如昨降觀天震井道脈慨潛伏循階瞻鐵
幹孔檜應無獨林間攷碑記今古殊雅俗昌黎推尊語
稱引亦已熟蔡侯忽驚詫朕兆殆先覺斯游符昔夢請
得舉其略初夢入名山幽局窺洞壑松間衆童子一一
雲中鶴身是列仙儒唱言從我學行辭本師去却顧似
不樂本師老黃冠氣象擬淵嶽杖履自逍遙我見亦心
肅旋聞語童子汝輩勤著脚仙道或難成藏拙此歸宿

我意殊不然還與其徒約成仙在精進有進更無却黃
冠特嘉歎諸子真有託風吟促分袂雲起隱垂幕回頭
望門榜五字燦金牋功不在禹下筆勢駭棱角夢回疑
不類到此竟重讀斯夢豈無微有心煩忖度我聞捧手
賀君啓賢關鑰親見大賢來微言闇相告平生距楊墨
寧肯襲其服神交聊寓意以道作標目雅意育英才菁
華豫儲蓄誰能任師道假手俾陶淑所嗟三代降士習
轉卑弱仙路羨蓬瀛道統忘閭洛不必謝榮名終焉保
天爵於中有樂地進退自綽綽詞旨抑揚間有志任求
索惟君矢精進黽勉後生勗斯言握樞要心印寄然諾

君今到豫章，髦俊廣羅絡。招邀上雲路，便遣蛻凡濁。大
儒西山派，腴味飽斟酌。澤潤及吾徒，文章歸道德。叶廊
廟既增華，官牆差不辱。吉夢獻王廷，得人斯報國。叶大
事有因緣，聖賢勤付囑。守先還待後，待子信不薄。神謀
半明昧，夢境故紛錯。試看洞天在，毋乃指白鹿。鯁生復
何幸，幸得與茲役。叶他日貪天功，實竝受其福。蔡侯顧
我笑，燭照抑龜卜。唯應謝神貺，藉子攝宗祝。此詩留作
券左右，剖持各

荆山橋

屹屹金城峻，湯湯石埭通。兩崖蹲渴虎，一道掣奔虹。跨

海嗤秦過安瀾頌禹功昔年淩夏漲愁絕呂梁洪

丙寅奉

旨重修甲子使粵過此水石崎嶇初不知爲橋也

徐州喜雪

我行齊魯間終日望雨雪意亦畏沾濡但欲醒萌茁今晨發徐州滕六送陰節山氣乍冥濛林端倏飄瞥客冬春早透到地乃旋減銀盃及縞帶頓遣陳言絕黃埃被新潤膩若和香屑麥隴露微青秀色殊可悅豈必淖然生塵封洗來潔回頭直北望漠漠同雲結應知來時路天澤總無缺哦詩方鼓舞驅馬漸蹙蹙前臨石橋度滑澁愁傾跌微聞僕夫歎爲已計全拙

喜雪疊前韻

前日過彭城作詩空喜雪裁足壓浮埃寧堪掩新茁沈
吟謝莊語諒不固其節道眼閱天花飛空聊一瞥難助
麥苗抽況教蝗種滅天公洗慳謗玉戲更矜絕旋令修
月戶傾襍撒瓊屑前驅挾凍雨珠迸驪龍悅川原忽鋪
錦白地光明潔我昨頗吁嗟於今舌爲結大造信難量
人情自多缺試看千里足將騁故盤蹇頓挫妙文情峯
巒起還跌風絮竟何心管窺應轉拙

合肥弔黃穉登

有序

穉登諱百穀錢塘人雍正癸丑成進士後與余同客臨

清縱酒談詩情款甚洽已應姚聖湖

三辰

少宰聘校文

江左將至廬州夢有沈初明者故明諸生爲合肥土神廟在廬州東門外與刻期交代而去醒卽感疾竟以所刻之日卒於使院少宰按故學冊并訪其廟信然遂易主於廟厥後土人祀之殊有靈爽同鄉某孝廉舟過其境心擬翌日至廟詰旦有村人擔牲醴至道孝廉姓名蹤跡俱合蓋村人將報賽於神而神先示夢俾傳語以餽也嗚呼使穉登需次得縣令能神明其政如是乎余甲子過此爲同事李文木秋部道之李故穉登同年約歸時訪其廟不果今重過其地仍不及往投詩弔之

一第俄成送老官居然廟食楚江干風波不假飛符定
解符籙山水還供點筆看正可客邀河伯餉莫教孫伴
社公餐九年兩過頻回首惆悵清源舊雨殘

示僕

出門僮僕親一僕小尤黠月行二千里顏色頗能察問
公在淮北快馬無勞鞭當午已稅駕胡乃常憂煎自公
渡淮南馬蹙蹄欲折連宵束炬行復何所欣悅竊窺公
情性似亦有常操豈期旬日間憂喜乃顛倒我笑顧僕
語小黠終大癡此中有妙理此理汝豈知昔未渡淮時
地澤行欲枯只疑萬里沙罡風捲平鋪此沙如蘆灰縮

水無餘溢不得天漿調不聽五種出我時亦復食我時
亦復眠此事梗胸次眠食常惓惓譬如病渴人舌本無
精液縱有七椀茶清風肯生腋今來渡淮後珠玉滿我
前汝輩自不見但看雪後田今日田中泥明日田中粟
古書固有云荒穀豐年玉汝何怕馬滑却嫌行玉山我
來相照映斗覺開心顏又如人苦饑見人得餐飯果腹
定何如虛中已先滿我心我眼中實有此二境嘉汝得
微窺嗤汝弗深省我語極深切僕意終然疑囁嚅不欲
道誘令重吐詞公不此間耕公不此間住正使如公言
於公竟何與公心獨營營毋乃自膠擾公言雜雅俗強

半更難曉我重顧僕語膠擾誠有然人生此世界大都
情所牽忘情置膜外安靜亦殊好幾見有心人祇知圖
自了我觀自了漢正與汝輩同人或急其急翻訝如顛
風僕聞如有慙回頭視儕偶其儕老更事寧肯參可否
汝見旣爾爾公言復云云主智自勝僕宜置勿復論

白沙嶺呈葛山

龍眠欲起攢青嶂鴻爪曾留認白沙

甲子先後
奉使過此一徑橫

穿雲繚繞萬松僵立雪杈枒盤空也學迴風舞眩眼疑
乘上漢槎不怕高寒還待月與君同聽戍樓笳

大雪行桐城山中有懷姚石農

竹樹迷枝柯雞犬絕鳴吠但聞落礪泉奔騰送征騎玉
龍何蜿蜒夾道儼鱗次冰髯垂帖地勢若攫珠墜我行
拂其顙亦或跨其背沈沈伏不動乃識戰酣睡山中臥
高士靜境想如是不知石戶農掩關竟何事應呼李伯
時起作白描戲

葛山風雪中騎馬甚壯戲呈一篇

山勢蹙舒桐天險峽關隘東西百里間地脈如襍積高
高還下下起落爭咫尺有時溪壑喧橫絕奏刀晝況逢
積雪後投足始開迹石滑泥轉膠水寬橋更窄松篁與
雜樹伺間巧相迫我坐筍輿中肩肘穩扶掖時時聞絕

叫便欲舉身擲得全殊不意雖窘亦無益居然學鎮靜
其實駭魂魄先生文武才良足壯行役迴策妙如縈善
騎故不擇宛轉蟻封盤撇脫山溪驀狐兔草間來尙堪
左右射放眼足冥搜空裏吟鞘畫紅笠映青氍鶴警遜
高格我初頗好騎裁足步廣陌於今轉衰廢髀肉任肥
瘠回思在北地千里平如席展驥讓君先執鞭諒吾亦
今來看獨往意乃無水石無深雪堅冰到處坦途關故
知臨事勇夷險志不易懦夫爲增氣驚歎每嘖嘖以頌
仍以規干慮冀一獲參政國大臣出領文章伯奉使職
馳驅防微謹銜策願紆運臂勤還享乘軒適倘輕千金

重朋好竊微惜斯言非我始請得徵古昔杜陵固有云
蔡子勇成癖

重過黃梅感詠

九江隔岸是黃梅曾記吾兄捧檄來我昔正留楊子宅
書傳聊訊鮑昭才縣治卽明遠宅十年重過占星出兩世三喪
閱水催兄弟俱逝姪三品亦亡孤雁自投沙瀨宿不鳴誰訴失羣

哀

積雪初晴自黃梅至九江喜而有作

久晴望雨雪雪足晴轉好起看雲澹澹晴意猶未老行
穿煙靄去開闔變昏曉徐聽清風生勢欲破空掃層陰

俄退舍開滌露杲杲靈景潑眼鮮積素已殊少連畦青
青麥縱橫列基道野菜試早花遙看黃蝶小陌上麴塵
勻柔枝漸低裊白水滿陂塘羣鳬恣搜攪林中鳩喚婦
意似重相保茅舍竹籬間紛紛挂襦襖故知沾溼重室
處亦多擾況我遠征行需泥幾時了天公憐久困披豁
慰潦倒馬尾初放梢蕭蕭快輕掉計拚半日程飛旆已
江表煙霄欣騁望倦關亦思矯匡君遣迎客五老鬚眉
皓

寄劉嘯谷同年

此郡古稱遷謫地我來頻感弟兄情

黃梅感念家兄嘯谷又被議留此

所欣堂上平安在大阮臨歧屬寄聲

莫管風濤爭九派且留面目對廬山與君一月期相見
可得同時策馬還

重游東林寺和王文成題壁韻

東炬渡江何草草明朝蚤入廬山好東林十載續前游
我與山僧俱坐老莫隨猿鶴漫興哀攬勝還欣祕境開
金埵靈文持誦久因緣如欲待重來來從慧遠禮華首
去逐淵明覓杯酒爐香一炷閱三生題壁安能免摧朽
未妨俗駕戀山庭春生蘭茝盈煙汀攀芳興足晚歸去
湖畔迴看萬疊青

發南昌

鎖院困丹鉛無心問春及江城花落盡啓戶始出鰲從
茲迫人事晨夕疲拱揖況餘文字債殘瀋硯田拾前經
東湖畔便擬放舟入公讌列花洲煙水素心慙軒窗賦
金奏魚迸鳥深戢冬春米價高頗有飛鴻集中承宣

上德身出拯其急主去客還留於義乃非協匆匆滕閣

望西爽故堪挹由來南浦

驛名

別那得手不執似是惜分

張聊同脫羈縻繫櫂唱倚風聽輕帆翦江捷諸生或追送
百亦得其十見說桃李繁新陰賸枝葉行行傍山麓芳
草翠鮮浥天涯引歸興軟襯馬蹄踐却思來時路生意

殊枯澀應候發華滋鋪菜自周浹風光驚刺眼正坐久
不接并木競敷榮衰旺總無涉最喜麥抽芒還看菜成
莢春疇幸占稔詎止慰耕鋤憂國願年豐斯懷常汲汲
奉使得循行風謠驗歌泣初程欣所見雅詠取原隰

暮春之月日行佳山水間田家風景尤可樂也得

絕句六首

雪點征衣送柳花拂鞍時見筍梢斜翠微樵徑分明在
強半都教茂樹遮

日氣烘黃宿霧醒偶來繫馬坐空亭陂塘如鏡曉風靜
柳帶蒲芽相對青

疊嶂穿來喜就平沙洲缺處石梁橫松篁滿塢碧雲合
中有畫眉千嚙聲

溪山蕭灑映清暉竹露松煙潤客衣千頃綠畦誰界破
一雙瞥見鷺鷥飛

千層翠浪麥畦風香篆紆成一徑通茅屋斜開依水曲
飯牛人在綠陰中

鳴闌低亞接雞窠喜見田家字畜多清響忽從林外度
半池萍葉一羣鵝

卽目戲成

耕夫憫牛疲暫就樹陰息豈獨牛喘蘇亦自養其力人

牛默相對有思抑無思牛心故不容

見漢書五行志

人則吾不

知但看坐忘時孰云非太古過客入於機強將混沌剖

徐州訪教授梅繩波

予援

同年不遇

十載栖栖覓一羶不知除目幾時宣偶因使客浮查便

忽到先生學舍前投老各從文字役

時梅送考江寧

相逢仍是

別離緣萍蹤欲聚終難聚只合天涯雨邈然

四月八日佛誕實

先府君生辰十有一日則

先太安人忌日也姓自兄弟俱亡門戶凋零可

懼今獨身從役於外欲求陟謁詩人所望俱不

可得較多一予季之戚耳爰作詩以志痛云

麻衣如雪別松楸，匏繫萍浮十五秋。
夢到九京惟北望，年來兩度亦南游。
過家上冢緣應蚤，成佛生天福自優。
岵岵雲埋空隕涕，予兄予季總知不。

鄭州會有序

明靖難兵破鄭州，墮其城遂廢不復。
今隸任邱，每歲四月南北商貨雲集，
謂之鄭州會。盡一月止稅課出焉。余
適遇其盛，率題一絕。

師出無名靖難名，雄關失險竟夷城。
都緣地脈難堙絕，曠野時看百寶生。

將入國門呈葛山

祕省追隨十載餘
嵩雲燕樹嘅離居
喜看巢鳳歸綸閣
旋共星輶奉簡書
致遠正勞望負鰲
聯吟殊愧蚓投魚
還朝却恐輸行役
地近情親迹較疎

六月十八日 正大光明殿

御試賦得風動萬年枝

得名字五言六韻

珍木當軒合清風
繞殿生垂陰
瓊砌遠颺影
綺窗明冬夏
常青色虛空
不住聲栽培
元得地披拂
更敷榮已喜
恩光近還看
湛露盈藝林
傳秀句何減
謝家名

靜廉齋詩集卷四終

靜廉齋詩集卷五

仁和金 牲雨叔

房師龔醇齋

學海

先生聽鴻別業圖

癸酉

茅屋倚層巖宛轉補石罅峨峨出澗松偏蔭臨水榭濤
聲虛壑應飛雲千仞瀉騁望楚江秋離鴻適來下遠韻
與神謀清音指間化吾師能移情正在鼓琴罷

上巳過天龍寺

亡男三事殯所

殘漿澆溼紙錢灰白日荒荒掩夜臺正是良辰逢上巳
老夫如此踏青來

曉行

哢喔雞三噪
旁舍馬蹄動
張燈戒徒馭
短後便平飛鞚

前驅引中權
後隊護輜重
蕭蕭六七騎
部分亦有統
中宵苦餘燠
斗帳厭方空
凌晨衫纈絺
頗訝薄寒中
行來星漸稀
孤月睨空送
露草咽蟲吟
幽林傳鳥哢
山光映朝旭
紫翠閃爐汞
炊煙起蓬茅
漁艇出菰葑
憧憧廣陌間
鈴馱來轉衆
俄然清氣散
斗覺塵坌壅
興盡體還慵
思紛句難諷
吾仍就輕軒
上息續殘夢

樂志園題壁

有序

園在清苑縣方順橋太學生夏某別業也庚戌首春余自楚入都過此旅飯及見主人年已七八十矣今閱二

十五載奉使重過主人久歿而琴書位置不異嚮時花
草滿庭較盛於昔知其有賢子孫也四壁名流題贈甚
多率詠一律致感舊之意

挂壁琴猶在支筇老不存浮生占逆旅題句認高軒隨
意栽花藥居然長子孫沈吟臨逝水吾亦憶邱園

自定州至真定渡滹沱望恆山戲述形勢

中山五百里地形如掌平西南望天末淡染眉痕青側
匿時隱見意非余所經忽然張左翼萬馬同奔騰勢將
包絡我迎面開長屏滹沱復助險決溜當前橫河山相
表裏不殊犄角爭我來非浪跡銜命趨王程河流卽

云廣一葦不足凌羣山莽迴互九折猶可乘譬如得軍
號揮鞭穿敵營列帳盡懾伏直度無留行河神倩風伯
寄聲與山靈誰言

天子使自謂非狂生

獲鹿山中始見窰房

孤館夜聽雨泥滑愁仰高旣登山上山忽見陶復陶無
瓦亦不漏殊比油衣牢土室有真隱應笑乘軒勞

固關

真定初見山東西展屏障會聞率然勢首尾互相仗壯
心擬橫截當徑蛇分兩豈知入陣圖變幻迴殊相獲鹿

趨井陘崎嶇幾登降正如初入伏一折迷背向逡巡忽
開戶得間且奔放兩岸竦天墉一溝縈地網輾轉陷重
圍夾擊左右當雄關爭要地設險搃其吭屯營據山腰
列堠冠峯上想像大荒中凌雲快通望迴風鳴廣隧洶
洶駭川漲羣木助呼號噉于小海唱懸崖或崩墜帖石
以爲防輿夫避渾淖側足窘相傍嗟我不貲軀一跌非
汝償攝衣揮短策緩急吾自量盈谿堆石卵布地蒺藜
樣仍憂馬蹄踏不自意無恙却思搶攘際鼠穴苦相抗
誰歟下泝水赤幟一軍張誰歟開土門功冠中興將龍
蛇互盤卻投隙爭霸王地勢實使然不鬱那能暢時平

得安驅空覩險巖狀吾因與委蛇乘危轉夷曠祇愧少
雄詞筆力寫奇壯

南天門

早發平定州坡陁上山椒連朝經斗絕茲嶺非嵯峨重
關起樓堞不踰飛鳥巢出門倚空闊頓令眼界超遙峯
千萬疊凝黛低眉梢游龍效驂駕蜿蜒東西交居然啓
闔闔端拱羣真朝憑衿試回首始覺來處高直下臨廣
谷宛若釜底凹谿流四奔注蛛網不可捎平疇布方罫
有穗亦有苗定知厥壤異石骨函土膏撫此建瓴勢尾
閭何許消却想晉陽城故應水所包清時奠川瀆安流

信滔滔不然爨薪濕那得無鼃跳徐行到平地螺髻如
相招俄看奮迅出列嶂重遮邀前時所俛視今乃攀躋
勞去去勿復道吾還與山鏖

得蒲縣志大兄列循績中感詠一首

蒲城久抱鵠原痛新志驚看姓氏存賸有循聲傳晉楚
更無長物遺兒孫萍蹤飄轉常相逐雁唳淒涼不忍言
一卷史書良足矣挈歸酌酒報椿萱

龍窩寺

羊腸百折行逶迤土囊張口吞茹多千年神物此潛蟄
陸海豈必無蛟鼉疾雷破山埽腥穢漂殘龍蛻留龍窩

天開淨域化城現靈閣定合歸僧伽我初北上叩傑閣
風關鐵鎖聲相磋其中法寶不可見隔扉山果連筐籬
僧雛覓匙強諄語意恐慢藏師所訶緣崖右轉歷方丈
香臺金象雙巍巍我共乘寶筏背相向分道接引超恆河
憑陵倒影認來處何減置身宰堵波路窮回向別峯去
高高下下隨巖阿沿坡鑿磴劣容趾襯階草滑如披蓑
垂檐密樹幾冠挂循牆仄徑頻肩摩攀援升降擬猱猓
惴惴猶幸無跌蹉僂行宛轉入幽邃忽闖懸霤瞻羲娥
十步五步簇樓閣像設土木何紛羅莊嚴娟妙具神變
憚赫山鬼慙么膺煙霞縹緲上襟袂旛蓋婀娜牽藤蘿

鐘魚晝靜梵音歇別院但聽書聲訛村童不解此間樂
似遭束縛愁煩苛靈鼈偃伏乍昂首飛棟橫截騰虬梭
二甘露門宛相對佛頂拳髮排青螺東南迤邐就平處
却望彼岸增鬱嵯人行索索螳旋磨僧舍岌岌龜巢荷
探奇不厭繞三匝況復環轉堪婆娑平生濟勝每忘倦
年運而往今亦頗扶闌矯首一長嘯黃葉飛雨辭喬柯
支頤踞石覽形勢谿谷盤錯成白科山形包寺寺包路
枉矢斜拂通中過固關東下建瓴捷奔流至此皆盤渦
時清底用設重險聊付神鬼憑誰何傳聞剏始自皇祐
乾隆甲子崖重磨古今興廢亦常事惜少佳刻供摩挲

輿如曠如兩奇絕擬索筆硯資吟哦僕夫當道守輿馬
懶看出沒鑽蜂窠彼雖不言我神會乘危棄日理則那
歸飛莫作失羣雁決起便欲追駕鸞

禮闈同鄭誠齋

虎文

同年作用聚奎堂壁間韻

甲戌

文昌風景占春深東壁遙看斗柄臨堂上懸衡平似水
門前立鵠竦如林三更炳燭餘茶話廿載探珠憶海沈
得句正須防翦截莫教騰笑負初心

曾記三秋夜色深虛窗談罷月斜臨千金誰定文章價

一葉先辭著作林

丁卯與同年
湯荊岡共事

小別且留香篆在重來

徒聽漏聲沈望江南曲愁同唱

誠齋甲子與同年邵此
叔山共事詩寄意焉

夕應懸兩地心

阻風素食示王甥惕圭

希曾

老饕勘他嗜結習餘口腹江行駭顛風未暇問炊熟饗
人具盤餐將進轉縮衄寧知教官長仍自供苜蓿舉箸
粲然笑無肉頗不俗前宵渡于湖餽餉兼水陸漿藿凜
明戒累人慙仲叔詎有相公羊但減中丞祿今朝聊懺
悔物理驗往復於吾乃何有客況想頻顛賢甥應似舅
前定參飲啄淡味正深長妙覺在一宿

六安廣颺書院示諸生

我來六安國遺跡傳皋城重華布衣契久從雷澤盟天

位可虛讓文命殊心傾誰云頌三后理官偏見輕贊禹
發祥早白帝承金行其先實邁種厥後寧遭阨餘慶衍
仙李徽稱歸德明故知猶龍叟經義通刑名九江安足
齒雖王不免黔漢已附堯後布豈隕家聲霸氣厭氛霧
中天瞻景卿帝座引才子獨拜明良賡大雅如可繼茲
土元鍾英

歲暮潁州試畢舟次述懷

春深鑠院幾旬留典校南來水國秋淮右風塵連北地
江東文采近中州笑他骨肉聊萍聚幸有賓朋暫酒闌
回首一年彈指過蕭然清潁泛歸舟

諸君辱和前作奉答一首

莫訝秋冬一擲梭吳山楚水飽經過萍蹤感舊憐游子
風信迷方問浪婆酒乍富時須補債詩當險處却遭魔
諸公格律從來細眼暗愁看指上螺

疊前韻寫懷

輕舟葉葉去如梭到處丹黃點勘過聞道豈容嗤下士
聽經聊擬聚優婆金鐙刮目應除障雜毒生心自染魔
淺語且圖眉樣好莫教狼藉費青螺

神物希逢挂壁梭恩恩五郡半年過心閒隔舫邀歡伯
道遠開帆祝孟婆茅葦久親書少僻參苓日減病無魔

祇嫌兩鬢新霜滿佛髻還輸左轉螺

疊前韻示惕厓

文章千古織心梭一縷還從九曲過精詣有時穿溟滓
靈光斗覺照娑婆求珠未必能忘象喫菜何須諱事魔
辛苦尋源終到海休將淺酌笑持螯

寒女更深未住梭流光肯放隙駒過莫參浮氣情同客
須記慈心喻比婆仙欲升天常敗鼎佛將成道倍多魔
老夫梵行修持久接引頻吹大法螺

疊前韻志喜

天書飛捷鳳銜梭轉瞬還看萬里過愧我乘舟趨采石

輸他犯雪奪蓬婆域中自此真無敵道外何容更有魔
須識游魂曾假息龍威未屑碎蒲羸

疊前韻寄示三吾三俊

警情曾傳斷織梭挽強穿札幾層過文章世業慙名父
三五年華憶阿婆願爾斯才家少累聞言不信障成魔
燈前獨詠百端集幽咽愁聽古戍螺

疊前韻寄內

機畔應停軋軋梭璫窗圓月幾回過我元參學同居士
卿亦齋心作行婆算及米鹽差少債情牽兒女未除魔
橫江早晚乘風渡相望無勞上翠螺

采石山名

曼前韻答諸君見和

隔舫詩筒捷若梭，好憑消息遣客中。
過儘教競病，分窮韻肯借。俳諧詠怕婆，千尺手裁供意匠。
五兵神運敵天魔，海山珍錯嘗來徧。
遺味還應拾扁螺。

丁祭喜晴

乙亥

渡江十日結層陰，釋奠徬徨動夜吟。
化雨愧承君子教，披雲喜見聖人心。
趨蹌獻爵東西序，忖度循弦燥濕音。
歸路正聞喧屐齒，晨星遙映泮池深。

校射雨阻

更乞天公一日晴，春郊喜聽餓鴟鳴。
殘燈欹枕數更點。

老樹當窗報雨聲，假息布侯應未破。傳聞金埒信難成，
前宵入廟憐霑服。到此何妨暫洗兵。

二月十五日發和州 先太恭人生日也感賦一

律

九子何堪賸一身，廿年前尚慶生辰。承歡已向貧中過，
侍疾常從夢裏親。雲氣陰陰愁轉結，征途草草奠難陳。
江城鼓吹聽悽咽，此意憑誰作解人。

望雞籠山

大塊巋然峙孤圓，冠羣峯正如百子帳。高撐偃蒼穹亂，
石頗秀突鳥喙穿。深叢又如夜將旦，驚起赤幘公闖首。

擬爭出圈束愁離置昔傳歷湖陷遺媪奔山中神告幸
先覺劫數悲終窮家計委波蕩長物餘雞籠媪既化石
立籠亦憑雲封我聞笑啞啞斯語不足攻金陵覆舟右
廟貌嚴功宗雞鳴實更號肇錫與此同

江寧雞鳴山吾原名雞籠山

鄉南山南稱號還相蒙

西湖山亦有名雞籠者

峯巒指形似往往

因而重肖物輒有物孰尋朱朱翁必徵變化異天寶應
潛蹤陳倉與葉縣曠代分雌雄光怪有時發震響常隆
隆山川含霸氣世事方橫縱前人有奇策鑿破旋成空
莫矜司晨技補鳴徒召凶但學會稽產庶免牛刀紅石
雞元解語縮頸避談鋒

昭關懷古和何生縉華

日佩韻

關山天險控江東絕地還從橐底通他志成時看亂長
家冤報後又途窮同仇莫解亡吳恨寄語終慙復楚功
忠孝允符賢聖否靈胥元只是英雄

京口江流日夜東城懸鐵甕一關通已辭楚塞踰疆外
尙說逋臣阻路窮恩怨分明天有幸山川離合史無功
由來古蹟憑牽撫總羨春秋蓋代雄

鎮江亦有昭關已
酉過之有作今訂

正焉

雨過清流關

上山穿石穴下山墮雲海雨來溪水渾清流竟何在山

川無夷險設險險遂多安驅尙如此柰昔從軍何

清流懷古

連雲石棧鳥難踰宋祖當年卷甲趨誰識兩家皆閨位
翻令眞主作先驅宗臣乍得同心助皇甫還應假手誅
從古雄關多失險奇兵間道信堪虞

磨盤山

左江右淮爭長雄滔滔奔瀉同朝宗氣多散越少凝聚
眞宰何以全神工帝遣夸娥蹙地脈突起彈壓於其中
土龍百萬睡不動蛇蚓盤結紛橫縱雲蒸霧涌引而上
鼇背鼉肩摩蒼穹奇相支朴祁守分域懾伏不敢私交

攻珠馳壁坐蘊精粹勝國王氣當年鍾我來期月已三
過曰維夏始連春冬堪輿形勢指錐得進窺堂奧穿垣
墉升高不阻下不險履道坦坦東西通置身裁擬跨屋
極俯視斗覺雲蓬蓬米堆環列把茅葢石廩連屬憑苔
封團團覆釜鐵官出簇簇旋螺佛髻濃石三土七頗宜
稼豈以少樹嫌髡童泉從嶺半斗門蓄田向峯頂樓梯
重未論膚寸廣滋液卽山墾闢常占豐仙居澗水遠經
絡寬處儘可浮輕舸隔溪縹緲散村舍相看何異桃源
逢更無深岨長荒穢最喜渾穆藏棱鋒清流未免據隄
塞戰爭谿谷餘膏紅茲山嚴重控南紀坤軸潛運迴沖

融正如碩德處廊廟填撫中外殊雍容邦基自有磐石
固福澤益溢施無窮我從初過岱山鋪望嶽儼若承三
公稱名祇訝磨盤俗擬易南岱申尊崇山靈封號豈私
議毋使通人嗤妄庸作詩聊復記行役刻石亦足銘山
功

淮上阻風和宋可南

光熊

秀才韻

窮年文字役道路作鄉里一葦泛江淮吳儂應狎水狎
水幸安流破膽衝風起硯池餘墨濡閣筆不遑泚同舟
誇鎮定望表故知襄陽侯怒殊盛客氣有時已妥帖整
檣帆從容對窗几恍如回噩夢靜悟盈虛理順水復順

風吾將不知止

校射阻雨用東坡僧伽塔韻

淮流合泗還通汴斗起山城當一面我來風阻舍舟行
岡巒屈曲羊腸轉石磴疑攀烏鵲橋水鄉仍喫魚蝦飯
風不能驚雨不窘天工那肯由人便試聽鳴鏑自清心
暫卷歸旗君勿怨連朝閉閣類思愆盡日占雲真善變
媚川正使有蠙珠賈胡豈復多留戀若教借此息勞筋
身逸心勞情轉倦擬效坡公乞塔靈賢劫已隨陵谷換
無聊瞑目作神游馬足泥深濺芳甸

自泗州至古城作

青島雜詩集 卷二
三
斷續平岡土脈墳，
筇輿輕捷午風薰。
草香花氣欲成瘴，
山靄水煙同結雲。
麥隴青黃方繡錯，
稻畦疎密待秧分。
年豐暫許農家懶，
枕石高眠語不聞。

來安道中

澗水通流網交織，
村樹陰濃如潑墨。
麥收幾處廣場平，
風輕一縷炊煙直。
綠山遠放犢情閒，
啄粒低飛鴉翅側。
吟餘恰喜館人迎，
未熟黃粱歆枕息。

卽目

彌望多平綠，幽花點綴紅。
麥田圍廢塚，石屋隱神叢。
沒脛分秧女，欹眠放犢童。
行來勤覓句，小簇繪幽風。

映春園銷夏作

風檣南指認江灣半載馳驅偶閉關樹長漸遮雲外塔
樓開重揖檻前山懶尋石刻模糊字靜數苔階細碎斑
遣興肯隨閒草木好扶幽桂出榛菅

檐前舊雨連今雨架上生衣換熟衣濺齒減酸梅子落
拂書餘沆燕雛歸蠹深未見香堪辟蟲聚真非扇可揮
閒向後園山腳望曲池新漲隱苔磯

養拙還應此地宜物情聊向靜中推吉凶鴉鵲憑閒報
得失雞蟲想自知防漏但教添屋瓦買蔬何用拔園葵
窗扉對掩無多日蚤有藤蘿纏去結之

隔牆初引竹枝斜，秀色偏宜襯碧紗。
鳥語間關同碾藥，松濤斷續應煎茶。
文逾束筍旋披籜，迹擬浮河暫繫槎。
免俗未能餘一事，亦聽鼓吹亦聽蛙。

三吾學步八首疊前韻示之

結得茅亭俯碧灣，望中圖畫擬荆關。
人家樹隱參差瓦，江介雲連大小山。
桐亦有材終免爨，竹元少恨不成斑。
雨餘荒穢須芟薙，莫道無情棄蒹葭。

霽景斜穿白竹扉，碧鮮留潤在垣衣。
裁看梁燕將雛出，旋聽林鳩喚婦歸。
碎事漫勞斑管記，濁醪寧待玉卮揮。
閒來水檻臨風坐，髣髴西湖舊釣磯。

北窗慚說睡相宜好句還從象外推
繞樹雀窺蟬正噪
傍階扇舉蝶偏知會聞方丈多芝草
自笑元都有兔葵
水竹暫時容結夏文瀾且喜順東之

短髮頻搔儘帽斜涼颼拂拂透蕉紗
談鋒肯借三升酒
風味元勝七椀茶但得賦詩臨月榭
不妨隨地泛星槎
馨兒也解吾家事試筆居然便詠蛙

琴溪橋

山奔水橫截斗削巨靈掌半開青齒蒼
倒影碧波滉仙
人愛高舉選勝振衣上琴臺卽釣臺
煙霞恣奇賞垂竿
得龍子還向溪中養丹成跨之去遺操
水仙響他時重

靜廉齋詩集

卷五

古

來游無乃絀塵鞅正如富貴人常作還鄉想
緱山與幔亭用意故無兩藥爐有餘滓留乞
去鱗蟲長年年桃花水幻化浮蛆釀至今
琴魚名仙品供遠饌言從山根出應候定
不爽我來秋漲落巖洞指虛敞惆悵石梁行
無因看舉網

箬嶺

昨驚輦嶺峻箬嶺此重經宣歙分龍脊巖關踞虎形
箬嶺深留霧雨溪迅輓雷霆一線羊腸白千盤螺髻青
斜陽迴日馭倦客憩雲亭
三字嶺上題額累石俄成塞穿墉卽建瓴
穴通無鼠鬪澤疾有蛟腥入粵踰蠻嶠游并上趙陞乾

坤多設險疆索限維屏豈識江城近還憑石戶扁真爲
天子障獨愧使臣星驅傳逶迤度題詩當勒銘

秋夜池州試院感詠

露寒蟲語咽空廊風定燈青吐穗長高館正迎當戶月
齊山不隔及肩牆行來境地多瀟灑飲罷情懷獨慨慷
回首廿年芝隲別松楸無恙草微黃

先墓在青芝隲時冬祭將近姓去家

十九年矣

亡室王恭人忌日

三十年來別恨長勞君泉路奉尊章牛衣臥處無交謫
象服成時久悼亡弱女定知憐跋涉

長女從夫入蜀癡兒聊足

伴淒涼

殯所三事
樞附焉

孤蓬晚歲方行役手挹清尊手炷香

過昭關

有序

明程敏政有夜度兩關記謂自全椒趨和州過古昭關
今春自和至滁踵其陳跡遂和何生作懷古二首自謂
得之近從巢縣至含山乃知昭關固在此不在彼向所
度者殆州志所載夾山鋪之渭野關耳

列嶂層層拱玦環柘皋東下是昭關幾番攷訂仍沿誤
始覺篁墩記可刪

映春園賞雪用銷夏韻

半載誰來釣玉灣成堆落葉擁柴關呼童淨埽林間徑

攜客同看雪後山春事喜占三白兆衰年愁助二毛斑
淩寒莫倚松筠操簇簇穿沙有翠菅

白地光明出錦機笑他寒儉比麻衣曾無鶴氅誇高格
且學龍門任緩歸舞勢已隨雲影散吟情應借月毫揮
羣峯江上皆浮玉放眼還登采石磯

由來置酒兔園宜賦罷鄒枚總見推積素未虧天質在
陽春難和寸心知憑誰說餅空堆麪自可餐蔬試拾葵
鮑照詩披深屋爐溫觴詠足扁舟乘興復何之
雪拾園葵

梅蘂攢枝竹外斜暖烘殘日映窗紗情懷淡蕩隨飛絮
風味清新稱煮茶彈指年光成逝水回頭春意發寒槎

詩集卷之三
明知凍芋抽萌短口噤寧同被咒蛙

靜廉齋詩集卷五終